

Saturday, March 28, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT**

**REGIONAL NEWS BULLETIN
(MIDDAY)**



CLEANLINESS

Urban Development & Poverty Alleviation Department, Aizawl Smart City Limited, Aizawl Municipal Corporation leh Central Young Mizo Association tanghoin, Aizawl Khawpui Faina atana Coordination Committee buatsaih, 'Aizawl Khawpui Faina Hnatlangpui leh City Branch YMA Fai Intihsiak' chu tukin dar 7:30 khan Vanapa Hall kawtah hawn a ni a. He hunah hian UD&PA Sec Pu Lalmalsawma Pachuau chuan a hmanpui.

Pu Lalmalsawma Pachuau chuan thu sawiin, ram leh hnam hmangaihna kawngah Faina ngaih pawimawh a tulzia a sawi a. Mizo mipuite chuan mahni ram tia chhal tur an nei chu thil hlu tak a ni tih hriain, a enkawl leh tihfai kawngah pawh mawhphurhna kan la tur a ni, a ti a. Fai chu thil hlawk tak a nih thu sawiin, ram pawn atanga Mizoram lo tlawhtute hiptu pawimawh tak leh ram economic value tisangtu pakhat chu Faina a ni, tih a sawi a. Faina ngai pawimawh zual zel turin kalkhawmte chu fuihin, 'Aizawl Khawpui Faina Hnatlangpui' leh 'City Branch YMA Fai Intihsiak' chu a hawng nghal a ni.

AMC Municipal Commissioner Pu Joseph H. Lalramsanga chuan hun kaihruiin, Central YMA General Secretary Prof. Malsawmliana chuan Faina kawnga hmalakna chu mimal intin thleng phak a nih theih nan inzirtirna uar deuh deuh a tul thu a sawi bawk a ni.

He hunah hian UD&PA, Aizawl Smart City Limited leh AMC-a thawktute bakah tlawmngai pawl hrang hrangte an tel a. Vanapa Hall kawta 'Faina Hnatlangpui 2026' khuhhawna neih a nih zawh hnu hian Aizawl khawpui hmun hrang hrangah Faina Hnatlang neih zui nghal a ni.



LUNGLEI HPC

Lunglei High Powered Committee (HPC) Vice Chairman, Pu V. Malsawmtluanga MLA chuan sawrkar kum kal mekah cheng vaibelchhe 1,047 chuang hu ruihhlo man a nih tawh thu a sawi.

Tlabung Licheng Suarherawt Runa Young Mizo Association (YMA) Sub-Headquarters, Lunglei Inkhawmpui vawi 40-na a hmanpuinaah he thu hi sawiin Pu V. Malsawmtluanga chuan YMA kumpuan "Ruihhlo Do" chu Mizoram sawrkar pawhin thupui bera a neih mek a nih thu sawiin, ruihhlo do kawnga hma la tura a bika din Core Committee on Ruihhlo Do hma lakna atan cheng nuai 300 chuang sawrkarin a sen tawh thu a sawi a. Excise & Narcotics Department thawm chak nan lirthei 21 lei a nih tawh thu te, ruihhlo do kawnga beihpui thlakna 'Operation Jericho' chak taka kalpui mek a nih thu a sawi a ni.

Pu V. Malsawmtluanga chuan Mizo hnam peng hrang hrang tobul ziaka vawn that theih tur buatsaih tuma sawrkarin hma a lak mek thu a sawi. Mizo hnam peng hrang hrangte inkarah inunauna leh inpumkhatna nghet zawk a awm theih nan sawrkarin theih tawpa hma a lak thu a sawi a ni.



WEATHER UPDATE

Indian Metereological Association (IMD), Aizawl Director Pu Sudheer Kumar Dwivedi chuan hmarchhak lama chhum chhah tak satellite atanga an hmuh atangin Mizoramah naktuk thleng ruah an rin thu a sawi a, tek tla a nasa thei bawk a ti.

Akashvani News zawhna chhangin IMD Aizawl Director chuan chhum chhah tak hian hmarchhak state thenkhat Manipur, Meghalaya, Tripura leh Arunachal Pradesh te a tuam thu sawiin a inher danah Mizoram a tuam chho a ti a. Vawiin leh naktukah hian ruah sur bakah tek tla nasa te a thlen theih thu a sawi a. Ruah erawh a tlak tam lutuk an rin loh thu sawiin mipuite chu khawlaia an kalnaah fimkhur reng turin a chah a ni.

Vawiin bikah hian Mamit, Kolasib, Aizawl, Saitual, Khawzawl, Champhai leh Serchhip district-ah te ruah a tlak beisei a nih thu a sawi bawk a ni.



PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chhung leh ram pawn mipuite hnenah thu a sawi leh dawn a, Tun tum ami hi a tum 132-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.